

AKTA KERAJAAN TEMPATAN 1976

UNDANG-UNDANG KECIL VANDALISME DAN HALANGAN KERJA MAJLIS (MAJLIS BANDARAYA KUANTAN) 2024

Pada menjalankan kuasa yang diberikan oleh seksyen 102, Akta Kerajaan Tempatan 1976 [Akta 171], Majlis Bandaraya Kuantan, membuat dan menurut seksyen 103 akta tersebut, Pihak Berkuasa Negeri mengesahkan, undang-undang kecil berikut:

Bahagian I

PERMULAAN

Nama dan permulaan kuat kuasa

1. (1) Undang-undang kecil ini bolehlah dinamakan Undang-Undang Kecil Vandalisme Dan Halangan Kerja Majlis (Majlis Bandaraya Kuantan) 2024.

(2) Undang-Undang Kecil ini hendaklah mula berkuat kuasa pada tarikh

Pemakaian

2. Undang-Undang Kecil ini hendaklah terpakai hanya bagi kawasan pentadbiran Majlis Bandaraya Kuantan.

Tafsiran

3. Dalam Undang-Undang Kecil ini, melainkan jika konteksnya menghendaki makna yang lain—

“binatang” ertinya apa-apa jenis binatang termasuk burung, serangga dan hidupan air;

“harta Majlis” ertinya apa-apa harta alih atau harta tidak alih yang dipunyai, dibina, diuruskan, disewa atau diselenggara oleh Majlis yang terletak atau yang ada di dalam, di bawah atau mana-mana tempat awam atau tempat persendirian di dalam kawasan Majlis dan apa-apa harta mana-mana pihak atau orang yang berkontrak dengan Majlis yang digunakan bagi maksud memenuhi atau melaksanakan kontrak itu termasuklah apa-apa kerja yang dijalankan oleh Majlis dan mana-mana binatang, pokok, tumbuh-tumbuhan, rumput, sungai, tasik dan anak sungai yang di bawah penjagaan dan kawalan Majlis;

“kerja” ertinya mana-mana kerja yang dijalankan oleh Majlis atau mana-mana orang yang dilantik oleh Majlis di bawah mana-mana undang-undang bertulis yang ada di dalam, di bawah atau di atas mana-mana tempat awam atau persendirian di dalam kawasan Majlis;

“Majlis” ertinya Majlis Bandaraya Kuantan;

“pegawai yang diberi kuasa” ertinya mana-mana pegawai yang diberi kuasa secara bertulis oleh Datuk Bandar atau Yang di Pertua;

“tempat awam” mempunyai erti yang sama seperti dalam Akta Kerajaan Tempatan 1976 [Akta 171]; dan

“tempat persendirian” ertinya mana-mana tempat selain tempat awam.

Bahagian II

KESALAHAN VANDALISME

Kesalahan-kesalahan

4. (1) Mana-mana orang yang tanpa kebenaran Majlis melakukan perbuatan berikut—

- (a) menulis, melukis, mengecat, menyembur, menanda, mencakar, mencalar atau mengukir apa-apa perkataan slogan, karikatur, simbol atau apa-apa jua pun di atas harta Majlis; atau
- (b) memasang, melekat, menampal, menunjukkan atau mempamerkan apa-apa poster, pelekat, iklan, surat tempelan, notis, kertas atau apa-apa dokumen di atas harta Majlis; atau
- (c) menggantung, menyangkut, menaikkan, melekatkan atau mempamerkan apa-apa bendera, panji-panji hiasan, panji-panji bendera, banting, sepanduk atau yang menyerupai dengan sesuatu slogan, karikatur, lukisan, simbol atau apa-apa perkataan lain di atas harta Majlis; atau
- (d) melakukan, mengikat, menyimpul atau merantai apa-apa benda ke atas harta Majlis; atau
- (e) mencuri, mengalih, mengganggu, mengusik, memindah, mencatkan, merosakkan, melupuskan atau memusnahkan apa-apa harta Majlis; atau
- (f) membuat apa-apa ubahan kepada apa-apa harta Majlis; atau
- (g) mengalih, memindah, mengusik, mencatkan, merosakkan atau memusnahkan apa-apa jua yang dipamerkan, digantung, didirikan, dilekatkan, dinaikkan atau disangkut oleh Majlis; atau
- (h) meludah, membuang air kecil atau membuang air besar di dalam atau di atas mana-mana harta Majlis kecuali di tempat yang disediakan bagi maksud itu; atau

- (i) mengotorkan atau mencemarkan air di mana-mana pancutan air, kolam renang, sungai, tasik atau anak tasik yang di bawah penjagaan dan kawalan Majlis; atau
- (j) memotong, menggali, mengalih, memetik, membantun, merosakkan atau memusnahkan mana-mana pokok atau tumbuh-tumbuhan, bunga, daun atau dahan mana-mana pokok atau tumbuh-tumbuhan atau rumput yang di bawah penjagaan dan kawalan Majlis; atau
- (k) mengorek, mengangkat, mengambus atau mengalih tanah dari mana-mana harta Majlis; atau
- (l) memerangkap, menangkap, mendera, membunuh, memberi makan atau mengganggu mana-mana binatang kepunyaan Majlis atau yang di bawah penjagaan dan kawalan Majlis atau mana-mana orang yang dilantik oleh Majlis; atau
- (m) menunggang, memandu, menolak atau menarik apa-apa kenderaan sama ada yang digerakkan secara mekanikal atau selainnya atau meluncur dengan papan selaju atau kasut beroda atau skuter atau apa-apa alat lain di atas mana-mana harta Majlis yang bukan dibenarkan bagi maksud itu; atau
- (n) melakukan apa-apa perbuatan yang boleh menyebabkan kerosakan kepada harta Majlis

adalah melakukan kesalahan.

(2) Apa-apa tindakan yang diambil oleh Majlis atau mana-mana pegawai yang diberi kuasa secara bertulis oleh Majlis di bawah perenggan (1) tidak boleh ditafsirkan sebagai menghalang mana-mana orang daripada dikenakan pendakwaan bagi apa-apa kesalahan terhadap mana-mana peruntukan Undang-Undang Kecil ini.

Kerosakan kepada harta Majlis

5. (1) Jika seseorang melakukan suatu kesalahan di bawah Undang-Undang Kecil ini melalui sesuatu perbuatan, kecuaiian atau kemungkiran dan dengan perbuatan, kecuaiian atau kemungkiran itu orang itu telah menyebabkan kerosakan kepada harta Majlis, orang itu adalah bertanggung membaiki kerosakan itu selain daripada apa-apa penalti yang boleh dikenakan bagi kesalahan itu.

(2) Amaun bagi kerosakan itu, jika ada pertikaian, hendaklah diputuskan oleh Mahkamah yang mensabitkan pihak yang dikenakan penalti itu.

(3) Amaun bagi kerosakan itu hendaklah dituntut seolah-olah ia adalah suatu denda yang dikenakan oleh Mahkamah.

Halangan terhadap kerja-kerja pihak Majlis

6. (1) Mana-mana orang yang -

- (a) meletakkan atau meninggalkan apa-apa halangan atau galangan sehingga menghalang pelaksanaan kerja;
- (b) membuat apa-apa gangguan yang boleh menghalang pelaksanaan kerja;
- (c) menurunkan, menghilangkan, memusnahkan, mengalih, mencabut atau merosakkan penanda, papan tanda, papan arahan, atau apa-apa papan notis Majlis yang diletakkan di mana-mana tempat sesuatu kerja dijalankan;

adalah melakukan kesalahan.

(2) Mana-mana pegawai yang diberi kuasa boleh mengarahkan mana-mana orang yang menyebabkan gangguan atau halangan dibawah perenggan (1) untuk mengalih galangan yang diletakkan atau menghentikan gangguan kerja di kawasan itu.

(3) Mana-mana orang yang tidak mematuhi arahan yang dikeluarkan di bawah perenggan (2) melakukan kesalahan.

(4) Majlis atau mana-mana pegawai yang diberi kuasa boleh mengalih apa-apa benda yang diletakkan atau ditempatkan di mana-mana tempat kerja-kerja Majlis dijalankan.

Bahagian III

PENGUATKUASAAN

Kuasa untuk menghendaki maklumat

7. Bagi maksud mengesan punca dan mencegah perbuatan vandalisme, pegawai diberi kuasa boleh menghendaki mana-mana orang untuk memberi apa-apa maklumat atau mengemukakan untuk pemeriksaan apa-apa dokumen, buku atau rekod berhubungan dengan mana-mana orang yang menyebabkan kesalahan itu.

Kuasa penangkapan

8. (1) Majlis atau mana-mana pegawai diberi kuasa boleh menangkap tanpa waran mana-mana orang—

- a) yang semunasabahnya dipercayai olehnya telah melakukan suatu kesalahan di bawah Undang-Undang Kecil ini; atau

b) yang enggan memberikan nama dan alamatnya apabila diminta atau jika ada sebab untuk meragui ketepatan nama dan alamat yang diberikan.

(2) Seseorang yang ditangkap di bawah Undang-Undang Kecil ini hendaklah dibawa ke balai polis dan hendaklah dibawa ke hadapan seorang Majistret dalam masa dua puluh empat jam, melainkan jika sebelum dari masa itu nama dan kediamannya yang sebenarnya telah dapat ditentukan, dan dalam hal yang sedemikian orang itu hendaklah dilepaskan dengan serta-merta apabila dia menyempurnakan suatu bon untuk hadir di hadapan seorang Majistret jika dikehendaki sedemikian.

(3) Apabila mana-mana orang sedemikian dibawa ke hadapan seorang Majistret, Majistret itu boleh sama ada menghendaki dia menyempurnakan suatu bon, dengan atau tanpa penjamin untuk hadir di hadapan seorang Majistret sekiranya dikehendaki, atau boleh memerintahkan supaya dia ditahan dalam jagaan sehingga dia dapat dibicarakan.

Kuasa mengalih dsb.

9. (1) Majlis atau mana-mana pegawai yang diberi kuasa boleh mengalih apa-apa benda yang didapati tergantung, dinaikkan, ditampal, diikat, disimpul, dirantai, dipakukan, diletakkan, disangkut, ditempatkan, dilonggok, dipertunjukkan atau dipamerkan pada mana-mana harta Majlis yang berlanggaran dengan Undang-Undang Kecil ini.

(2) Apa-apa tindakan yang diambil oleh Majlis atau oleh mana-mana pegawai yang diberi kuasa di bawah perenggan (1) tidak boleh ditafsirkan sebagai menghalang mana-mana orang daripada dikenakan pendakwaan bagi apa-apa kesalahan terhadap mana-mana peruntukan Undang-undang Kecil ini.

Kuasa menyita dan sebagainya

10. (1) Majlis atau mana-mana pegawai yang diberi kuasa boleh—

(a) menyita, mencabut buang atau mengalih apa-apa benda yang didapati tergantung, dinaikkan, ditampal, diikat, disimpul, dirantai, dipaku, dilekatkan, disangkut, dipamerkan atau dipertunjukkan di atas mana-mana harta Majlis berlanggaran dengan mana-mana peruntukan Undang-Undang Kecil ini; dan

(b) memadam apa-apa tulisan, gambar, lukisan, tanda cakaran, calar atau ukiran yang dibuat oleh mana-mana orang berlanggaran dengan mana-mana peruntukan Undang-Undang Kecil ini.

(2) Apa-apa benda atau barang yang disita di bawah perenggan (1) ini ialah daripada jenis yang mudah rosak atau yang mengikut sifatnya lekas rosak atau jika penjagaan benda atau barang itu melibatkan perbelanjaan dan kesusahan yang tidak munasabah, atau dipercayai akan membahayakan orang ramai, pegawai diberi kuasa boleh mengarahkan supaya benda atau barang itu dilupuskan mengikut cara yang ditentukan oleh Majlis.

(3) Mana-mana orang yang menuntut apa-apa benda atau barang selain benda atau barang yang disita di bawah perenggan (2), boleh menuntut benda atau barang tersebut daripada Majlis dalam tempoh minima tujuh hari bekerja atau maksima satu bulan dari tarikh benda atau barang itu disita tertakluk kepada apa-apa syarat dan pembayaran yang dikenakan oleh Majlis.

(4) Majlis atau mana-mana pegawai diberi kuasa tidaklah bertanggung kepada mana-mana orang bagi apa-apa kemerosotan, walau apa pun sebabnya, dalam kualiti apa-apa benda atau barang yang disita di bawah Undang-Undang Kecil ini.

Penalti am

11. Seseorang yang melakukan suatu kesalahan di bawah Undang-Undang Kecil ini yang baginya tiada penalti diperuntukkan dengan nyata boleh apabila disabitkan, didenda tidak melebihi dua ribu ringgit atau di penjara selama tempoh tidak melebihi satu tahun atau kedua-duanya, dan dalam hal sesuatu kesalahan yang berterusan boleh sebagai tambahan didenda tidak melebihi dua ratus ringgit bagi setiap hari kesalahan itu terus dilakukan.

Pendakwaan

12. Tiada pendakwaan boleh dimulakan terhadap kesalahan di bawah Undang-Undang Kecil ini kecuali oleh atau dengan keizinan Pendakwa Raya.

Pengkompunan kesalahan

13. Mana-mana pegawai yang diberi kuasa boleh, mengkompun mana-mana kesalahan yang dilakukan di bawah Undang-Undang Kecil ini dengan membuat suatu tawaran bertulis kepada orang yang disyaki telah melakukan kesalahan itu untuk mengkompun kesalahan itu apabila dibayar kepada Majlis sejumlah amaun yang tidak melebihi amaun denda maksimum bagi kesalahan itu.

Pembatalan dan peruntukan peralihan

14. (1) Undang-Undang Kecil Vandalisme (Majlis Perbandaran Kuantan) 1994 [Phg.P.U. 1/1994] adalah dibatalkan.

(2) Apa-apa notis, perintah, kompun, lesen atau dokumen yang dibuat atau dikeluarkan di bawah Undang-Undang Kecil yang dibatalkan hendaklah, disifatkan telah dibuat atau dikeluarkan di bawah Undang-Undang Kecil ini, dan hendaklah terus berkuatkuasa sehingga dibatalkan.